

# UMS prihatin terhadap isu pengurusan sumber semulajadi

4B 15/6/2011 78

Oleh SITI AISYAH NARUDIN & S. CONNIE PEARL SUIL

utusanborneokk@gmail.com

KOTA KINABALU: Dalam usaha menghasilkan pengurusan mapan terhadap sumber semulajadi, Universiti Malaysia Sabah (UMS) melalui Sekolah Sains Sosial (SSS) terlibat secara aktif dalam memberi penilaian terhadap kuasa komuniti tempatan.

Naib Canselor UMS, Briged Gen. Prof. Datuk Seri Panglima Dr. Kamaruzaman Ampon berkata Sabah satu-satunya negeri di Malaysia yang mencuba untuk membawa isu berkaitan kuasa membuat keputusan terhadap kegunaan sumber semulajadi.

Menurutnya, secara khusus, kuasa komuniti setempat melalui pengetahuan mereka telah diuji semula untuk pemuliharaan.

“Semestinya menilai isu sumber semulajadi dan pemuliharaan memerlukan kita menjangkau sempadan pengetahuan yang mana ia dikenali sebagai disiplin,” katanya.



**CENDERAHATI...Inon (kanan) ketika menyampaikan cenderahati kepada Kasim sambil diperhatikan oleh penceramah jemputan, Prof. Dr. Tania Murray Li.**

Beliau berkata demikian ketika berucap merasmikan majlis pembukaan Simposium Antarabangsa Terhadap Pengurusan Masyarakat dan Sumber (ISSRM) 2011 di sini kelmarin. Teks ucapan beliau dibacakan oleh timbalannya, Prof Madya Dr Kasim Mansur.

Kamaruzaman berkata, memikirkan masa hadapan dalam pengurusan sumber semulajadi tidak akan bermakna tanpa melibatkan penggunaan kuasa dalam universiti, institusi kerajaan

dan masyarakat keseluruhannya.

Jelasnya, pengantarabangsaan adalah objektif utama dalam sistem pendidikan yang mana di UMS, ia boleh dilihat melalui kerjasama aktif dalam penyelidikan dan program pendidikan bersama universiti di seluruh dunia.

“SSS juga menjalankan penyelidikan atau pun kerjasama pendidikan dengan beberapa universiti luar termasuklah dari Australia, Kanada, Jerman, England, Indonesia, Jepun, Thailand dan Filipina,” katanya.

Sementara itu, Dekan SSS, Prof. Madya, Inon Shaharuddin berkata, simposium berkenaan sebagai forum untuk bertukar-tukar pendapat, pengetahuan, kaedah baru, dan teori dalam pengurusan sumber.

Selain itu katanya, ia juga bertujuan untuk memberi pendedahan terhadap pengetahuan terutamanya kepada mereka yang tidak mampu pergi ke luar negara disebabkan oleh masalah kewangan.

“Hasil usaha yang berterusan dari pihak jawatankuasa penganjur, kini kami berupaya menjadikan matlamat penganjuran ISSRM menjadi realiti,” katanya.

Turut hadir, Ketua Jawatankuasa Penganjur, Prof. Dr Fadzilah Majid Cooke.